

東明縣新誌卷之一

輿地誌

經界

幅員

山川

堤堰

土質

星度

東明縣誌

卷之一 目錄

東明縣新誌卷之一

輿地志

吾國稽古建國已五千年唐虞以前夏平尙已越自神禹區爲九州由夏迄周沿制未改漢唐以還若曰州郡若曰道路若曰行省雖名稱迭更而疆里犬牙之錯小大指臂之使則數千年來一轍同軌未之或易東明介河濟之間當魯衛之衝開化最早代鍾名人騫華大賢相率棲隱于漆上莊叟逸致逍遙作吏于斯土固也人傑而地自靈究之地靈而人斯至況乎非人無國非地無人居是邦也不知其幅員之廣狹山川之險易道路之均平與夫如何沿革有無古蹟物產何似可乎是以郡國誌乘罔不以輿地爲首屈而此次新誌之修仍援斯義焉作輿地誌

東明縣誌

卷之一

輿地志
經界

經界

人人積聚而爲村落村落積聚而爲郡縣郡縣積聚而爲國家無古今中外數千年大抵然也然而風俗有殊物產亦異南船北馬易之兩失宋斤魯斧遷地弗良甚至江南之橘可變爲枳燕客說郢徒貽人笑無他經界有以限之也東明東接鄒魯西毗汲滑而北近濱濮之郊南去夷梁不遠究之似鄒魯汲滑而非鄒魯汲滑也類濱濮夷梁而非濱濮夷梁也蓋東明自有東明之特性是以全志之修首以輿地而輿地則首以經界更于經界之中列節爲五曰幅員志廣狹也曰山川曰堤堰誌形勢也曰土質曰星度誌地之肥磽與其寒暖也庶幾觀之者瞭然指掌云作經界攷



幅員

東明在禹貢爲兗豫二州之域地介魯衛勢當河濟故大名府志特贊之曰東縉西漆古稱名勝而當北宋建都大梁之時大名則爲北都東明更當兩都之衝三路之會而華轂朱輪者所必經也宋楊侃皇幾賦云擁強兵衛近甸大郡雄藩爲屏爲翰者九縣東明其首也而縣舊志載云長堤捍其洪流巨津升爲沃壤宜乎復封疆之舊而著大邑之稱謹按其幅員之廣狹奈歷代以河決之故或存或廢時有損益無可詳攷只可以現在之道里準舊志之所載俾見真象而免虛僞

全縣幅員南北袤計八十五里東西廣計八十里縣城在全境中計之偏東北隅距舊府城即大名府二百二十里在其東南距南都陸路一千二百里距北都陸路一千三百里若以運河水路計則爲二十站

東鄰山東之荷澤至荷屬呂陵寺三十里爲兩縣畫界之處至荷澤城計六十里西鄰本省之長垣至屬舊城村計三十里爲兩縣畫界之處至長垣城計七十里

東明縣誌

卷之一

幅員

二

南鄰河南之蘭儀至本縣屬杜勝集南寨門外計六十里爲兩縣畫界之處至蘭儀城計一百三十里舊誌載儀封界也爲一百里今則蘭儀合并乃以蘭陽城計算故多三十里

北鄰本省之濮陽至本縣司馬集迤北計二十五里爲兩縣畫界之處至濮陽城計九十里

東南鄰山東之定陶距該縣城計九十里

西南鄰河南之蘭儀距該縣城計一百三十里

東北鄰山東之濮縣距該縣城計一百五十里

西北鄰河南之滑縣距該縣城計一百二十里

此東明幅員之大概也論所屬則三省攷其鄰則八縣清季迄今省自爲制縣自爲規譬如病夫之身已苦身不使臂臂不運指遂致縣屬東南兩方之安危須視豫之儀魯之荷爲轉移西北兩方之治亂須視魯之濮本省之垣濮爲比例矧以近年不僅自爲制自爲規也竟爾因怨構兵戈操同室若魯豫交閔東南爲必經之地南北稱兵大河

更結穀之尤萬物遭劫生民塗炭幅員雖猶昔也而憂樂迥殊治亂大異矣足徵幅員所在有關民生者鉅也

山川

東明當河濟介魯豫西距太行二百里而強東接秦岱四百里而弱平原大陸絕無所謂山者間有之邱阜類耳然或因人而顯或因事而著縱云山不高林不深而究有不可誣者姑述之于左

白雲山 山在縣東北二十里許本郊原平曠地也突起土山隆然高聳以每值平旦白雲與山色相映嵐霞一片蔚然可觀遂以名之曰白雲云史稱漢留侯張良辟穀于東昏之白雲以爲卽此地故東明有白雲里附近有懷良村而白雲寺舊傳山前有張良洞只以大河之淤陷靡常僅餘荒煙蔓草求髣髴而不可得矣

按留侯辟穀處在陝南城固縣廣輿記言之綦詳而此處亦云然或者其又

東明縣誌

卷之一

山川
龍光山 河流

三

一區乎矧侯高帝末年卽致仕不預朝事食邑于留留卽今河南之陳留縣去東明不遠遊而樂之乃棲止焉亦事理中之應有者

龍光山

山在縣東南三十里許當時壘土爲臺形勢巍峨歷數百年迭經大河淤沒尙突然特起迥超平原迨至前清咸同間兩次大水始成平壤物之興廢蓋有數焉今縣屬之龍山集卽以是而得名也元時有鄉民曾見龍現于其上赤光閃閃直巖下電人大驚異後值歲旱往往相率禱雨于其旁且輒應故人亦呼爲龍掛山

河流

東明山陵旣已無多而河流除黃河滔天巨浪歷爲民患外所餘如響子口賈魯河等亦類多或涸或廢故蹟難按今僅援舊誌所載參以現在情形分別列後俾閱者明乎今不泥乎古故先將涸廢各河列之而以黃河殿其後以期詳盡焉

響子口

口在縣西南二十里卽歷代黃河之故道也當時其流奮激聲聞數十里故

名今廢

濟河 河在縣南三里許當時與洪河合流故亦稱洪河蓋二水合流之會今已

淤廢

按水經濟水出于王屋爲中國四瀆之一名曰沆水東流爲濟歷浪蕩渠經陽武封邱出東昏之故城北卽戶牖鄉也東過平邱之故城南又東過濟陽之南以城在濟水之南故名卽春秋時古武父地漢光武誕生處也自茲經宛句轉糞棗而出于陶邱北會汶水而入于海濟水之性與他水不同隱見靡常水在地中行故豫之濟源卽王屋山所在地也東明原爲濟陽亦以水見故耳今竟以黃河之決淤而涸迨至下游而復見于濟甯濟南亦屬一大異事

賈魯河

河在縣南斷頭堤距城六十里元季南北漕運所必由也至正間大司空賈魯所開故名當時自斷頭堤東北流入山東境今亦因黃河之變遷靡常而

東明縣誌

卷之一

濟河 賈魯河
枯河 濮河

四

涸廢矣

枯河

河在縣南六十里杜勝集稍東南夾河內蓋黃河之支流也乾隆初卽涸故名曰枯河今則河形猶具

洪河

河在縣東南三里許當時至此地卽與濟水合流折而東注入于海已詳濟水條茲不贅惟查此水源出滑縣之衛南坡至此始與濟合每值秋水驟至自洪門村至十里鋪數十里俱患淹沒迭歲大凶稔萬歷末邑侯李公遇知率民夫督工開鑿而還洪水于故道民始安業此明季事也而今則與濟同涸矣

澠河

河在縣南五十里李六屯村迤南亦黃河之支流也禹貢云水自河出爲澠由西南之故黃河道而來自屯前遶向東北經范士屯前後復折之東南去入山東界乾隆時卽涸而迄今故道猶存

濮河

河在杜勝集西北由袁長營經袁旗營趙官營等村東北流與洪河合抵張

秋等處轉而入海原係濮河俗訛爲普河蓋音之錯誤耳本省之濮陽縣山東之濮縣皆緣此水而得名也而今亦涸廢矣

漆河

河在縣北門外玉帶橋下西自漆堤東北入洪河抵張秋轉入于海東明得名最古者卽此水莊叟爲漆園吏是也明清以來縣書院之名曰漆陽蓋亦本斯義今則涸廢矣

黃河

河源星宿經七千里而入海華北百川所匯注也其自砥柱狂瀾而下瀆淵西浮邱東乃禹之故蹟漢決瓠子宋決六塔金決陽武明決黃陵皆集海內之物力而始畢是役則爲害固影響于全國矣而東明尤甚雖自賈魯改濬奪淮入海浩蕩淹沒較之爲輕然以歷代編年攷之東明無二十年不被災之時斯民之逃亡陵谷之變遷罔不因是良可慨也乃自清咸豐五年河決而復北由銅瓦箱口大溜直奔賈魯河其支溜則奪洪河漆河之道一片澤國汪洋彌望迨至七八兩年復由賈魯河折而北自李官營別開新河入曹

東明縣誌

卷之一 漆河 黃河

五

州之七里河遶而東北行十十一兩年復盡併入于洪河逼近縣城瀰漫巨浸而百姓幾無生人趣矣蓋以洪楊方張江南用兵英法內侵塞北蒙塵雖官設總河特派欽差而國帑不給遂致其魚同治二年秋水大至衝入縣城傷人畜壞官私廬舍不可殫述而大溜遂西徙十里餘由李連莊趨高村復折而東北行由黃莊劉莊始入山東之濮縣界每值伏秋水勢漲泛鵲突而來支派紛然油油黍稷依然果魚蝦之腹者又十年及光緒建元山東巡撫平遠丁中丞寶楨親督荷澤之賈莊決口合龍後痛定思痛怒憂在抱遂咨會直隸總督合肥李伯相鴻章會築黃河南岸大堤而全境數十年之大患始告減殺無如民國幕開內閥方殷誰暇及此堤內之灘田日淤愈高堤面之舊築日摧愈低因是民國六年七八月兩次堤決一由長垣屬之范莊一由本縣屬之黃堎集而下游所淹沒者盡爲東明境民國十年又決於黃堎集民國十二年三決于長垣屬之郭莊民國十五十八二年又數決于縣屬

下游之劉莊雖設官增堤究之不管七年之病求三年之艾也秉國成者其多加之意也可

按東明所屬之河流無論存涸概如上列茲以潭渡溝渠等類附之

柰家潭

潭在縣東十里北曰長潭南曰圓潭相去里許峙相望也每值秋塘水滿江天一色之際遊其旁者甚多以為可人意今亦廢涸無存矣

黃陵渡

渡在縣東南八十里源深而形小至易傾也一遇秋霖輒泛濫平原瀰漫四野讀之者罔不嗟奈何蓋以防之不可塞之弗能也迨至咸同以後滄桑大變而此渡亦涸無須救而患平殆天工之所以為巧歟

杜勝集渡

渡在縣南六十里今淤廢

八里溝

溝在縣南孫家莊轉入賈魯河長止八里故名今淤廢

司馬波溝

溝即芟河故道也康熙間已淤塞及乾隆十年大名府任宏業相度地勢以為可濬命開州即濮陽縣典史張琰督修起公西集至韓家岡入漆河長二

東明縣誌

卷之一 柰家潭

六

劉樓渠

十五里洩水而下當時人稱其便今為大河所奪更無蹟可覓矣

渠在縣西南劉樓集南郊即咸同間黃河所經過者也現按其形勢係由該集趨東北長垣縣屬之楊莊遂分為兩股北股由葛埭抵魚窩毛營至陳屯又分為兩股北股由小沙壩堆北至管寨入山東界南股由郝橋牛王廟韓樓入山東界至由楊莊原分之南股則折而東南由平岡營東明集趨東北馬主簿經五霸岡前後入山東界此渠為最新亦為最大近年堤決泛溢多由之順而下洩雖收水涸之効而鄰渠各村民罔不視為畏壘也

杜勝集渠

渠由杜勝集至柳上分為兩股北股抵龍山集入山東界而南股亦旋入山東乍而平行一片不可辨識矣

黃莊渠

渠自黃莊經夾堤王許寺至張斗宏即入山東界

極南渠

渠由董莊呂溝等處抵金堤集即入山東界蓋強半為賈魯河之故道也

嗚呼陵谷時變滄桑靡常明清間之溝渠已多半淤廢遑論古代不過大河常在則大患常存塞之彼者濬于此于民生無毫末補也倘如美人某之主張大河由砥柱而下畫爲兩派一派仍沿元明間故事由宿徐會淮而入海一派仍還之澶淵浮邱間復禹故道餘再多濬溝渠殺其勢而收其利則東明長垣等縣之大困沉疴或可有瘳否則民生之大憂未艾也偶誌及此直欲搔首一問蒼穹焉

堤堰

東明數千年來受害最鉅者爲黃河而大工大役亦卽因之而興堤若堰是也漢修金堤以迄今日或故堤加厚或另築新坊爰以舊誌及近年新修各名稱依其年代先後次而列之俾資談河防者攷焉

護城堤 堤以護城者也故名蓋古代郭郭類耳東明城修于弘治初而堤亦卽隨之以築周圍八里有奇純以土質寬兩丈高丈餘至萬歷十六年知縣朱

東明縣誌

卷之一 余家潭 堤堰

七

誥重修縣人副使穆文熙爲之記載在縣誌藝文錄益稱堅固清順治七年河決荊隆城圯堤亦頽壞殆盡北關玉帶橋亦沒入漆河致堤旁之水與河水合流來往弗通者累月

清康熙十年知縣楊日升重修玉帶橋復築城堤並植柳其上以期盤固及康熙六十年河決釘缸幫堤若橋復傾入河城外咫尺卽爲巨浸縣城無屏翰助矣

清同治三年因河患復建重修之議周圍計築一千六百丈底寬三丈頂寬一丈高一丈七年知縣楊培澤重修之頂則加寬二尺光緒五年知縣王家瑞又重修高加二尺頂加三尺底加一丈綜計三次修築底寬四丈頂寬一丈五尺高一丈二尺

按此堤之修迄今已七十年矣猶儼然在目者也風雨剝蝕不無侵削之虞而時值擾攘對于城池尤具莫大之關係亟應時爲修葺也

長堤

堤在縣南六十里杜勝集南關外西至長垣之西南東抵曹州界蜿蜒二百餘里堤鋪八十餘所舊志不詳創于何時大抵亦元明間是也明弘治間大名知府李瓚增修之堤在縣境者統計三十三里所經爲靳口魏口玉皇廟劉皮口盛口杜勝集何二莊柳林九埠口胡廠十村始抵長垣屬之紙房集

明萬歷十五年河決荊隆經東明而東抵張秋將害漕運詔遣給事中長居敬持帑金修補舊堤卽命知縣朱誥經理其事歲役計高一丈五尺寬兩丈置七鋪僉夫看守旋奉詔以大名府通判東明縣承專司之十八年知縣區大倫栽柳堤上計十四萬餘株根結堤固數十年恃以無恐

萬歷三十一年曹縣王家口將開新河山東巡撫黃某擬在河之上流築堤防潰時知縣常澄力陳不便遂中止僅于所屬長堤之三十三里內依時增修以杜水患尋由廳官謝某同縣丞賀成名用帑一千餘兩工夫一

東明縣誌

卷之一 長堤

八

千四百餘名歲修之旣而派夫六百名看守而總河某復檄修南北橫堤知縣常澄又力陳不可事復得寢

清康熙六十年河決釘缸幫歷長垣東明抵張秋又大爲運河害詔發帑重修而以河間府同治高鑛董其設計用土一十三萬八千六百三十八方費銀一萬六千六百三十六兩六錢三分高一丈六尺頂寬兩丈底寬八丈五尺較前大爲堅固

堤柳自知縣區大倫創植之于前康熙間楊知縣日升復補之於後旣護堤根又蔭行人固盛德事也只以當時密邇杜勝營兵士之樵採任意遂致植不勝伐日見枯敗在乾隆間已嗟奈何矣

按河決銅瓦爲咸豐五年迄今已八十載滄桑旣變堤已頽圯現雖蜿蜒可指而若斷若續一望而知爲陳物也所惜當民國十五十六等年魯豫交閼之時徒資軍閥者相爭之地勢尤不禁太息焉

金堤

堤在縣東南七十里西接黃陵岡東接小張家灣乃明時黃河分派決溢之地弘治間劉忠宣公大夏督修大堤兼飭大名知府李瓚修築凡二百里當時設巡檢一員專司護守清雍乾間已爲廢物而今只餘蜿蜒之髣髴云村有金堤頭者以是得名

海頭集堤

堤在縣東北二十里海頭集附近故名明嘉靖四十二年修當時爲備漆河洪河泛濫始修是堤今水既涸而堤亦圯矣

漆堤

堤在縣西十里許專備漆水之泛濫者故名俗訛爲七堤謂堤長七里也誤矣今已廢圯

孟華堤

堤在縣南二十五里柳園店村里許蓋因明時胙城縣有孟華潭每屆伏秋水漲由滑縣南偏東北注入衛南坡轉而東漫衍于東明境然後入山東界其堤東抵山東西至滑南綿亘三百里乃以潭名其堤者今胙城併入延津潭亦淤墊無遺而堤亦隨之矣

東明縣誌

卷之一

金堤
斷頭堤

九

斷頭堤

堤在縣南七十里乃前敘長堤之支派也截其首故名斷頭云今廢

杜勝賽堤

堤在縣南六十里杜勝集迤北明嘉靖十三年管河通判陳萬言奉命增修者其里數起止舊志闕如今亦不得而詳也堤已廢

大堤

堤在縣南六十里杜勝集東西自河南之胙城起歷長垣東明入山東之曹縣單縣又東而至江蘇之徐州界凡數百里此乃明弘治間河決黃陵孝宗特命劉忠宣大夏督兵夫數十萬而修築者也堤形高且寬屹然保障河不爲民害者垂數十年首輔少師劉文靖健刊石紀之今堤尙蜿蜒可指然亦續斷有間矣

夾堤

堤在長堤之北大堤之南故名其修築年月起止里數均未載無由攷也故略之想亦圯矣

按上列各堤多半備黃河之患若孟華潭堤漆河堤蓋其小者耳黃河既已改道堤防自應另築而歷代竭全國物力以版築者遂芥塊視之則黃

黃河大堤

河爲害之烈竟千古如一日矣茲將現在之河堤詳列于後以誌嘆感云
清光緒元年下游山東界之賈莊決口丁文誠寶禎時撫山東督塞決口
合龍後咨請直督李文忠鴻章會築堤防以障久遠邀可卽聯銜入奏得
旨允行遂卽動工修築竣工堤長統計一百八十里而所占之地則爲直
魯豫三省豫最少直次之魯最多並詔大順廣兵備道兼管水利大名府
同知移駐高村創築之始緣大略如此

其時知東明縣事者爲孟丕顯奉命修築乃自西南長垣境李連莊起經
高村至黃莊而下始抵山東界計長六十里有奇內有濮長兩縣地二十
里高一丈四尺頂寬三丈底寬十丈並由東撫直督及總河會奏設立廳
汛分段管理而東明屬內之堤畫爲三段稱之曰上中下三汛每汛設汛
官一員其由李連莊而南經長垣境四十五里至黃集南端入河南之考
城境三里許計共四十八里亦係同時建築者較小于斯堤故稱之曰黃

東明縣誌

卷之一 黃河大堤

十

河小堤

大堤上汛于光緒七年築圈堤于大堤之外自長垣境謝寨起經齊王集
迤西至土地張止二十二年又築圈堤由齊王集起至蔡寨止

大堤中汛亦於光緒七年築圈堤自雙井起至雙堡屋止十一年又築圈
堤自宋寨起至白店止二十三年又築圈堤自橋口起至周寨止二十四
年四築圈堤自周寨起至岔河頭止三十四年五築圈堤自周寨起至高
村止

大堤下沉於光緒十一年水決王莊大堤乃於洪莊築大堤東至鐵莊二
十年築圈堤自單樓起至莊寨止二十四年又築圈堤自莊寨起至後衙
止

小堤長四十八里北接東明之大堤南至考城之圈堤其所占強半爲長
垣境旣如上述自光緒元年築成後四十餘年亦未曾潰決不意民國六

年水漲過大堤形亦較削小遂致七月初一決于長垣境之范莊八月初再決于東明屬之黃垆汪洋瀾漫受害最先且多者卽爲東明屬之東南各村時尹大名者爲姚聯奎費帑三萬餘元于霜降水涸後卽堵塞之並于范莊添設汛官一員

民國十年七月初水又驟漲三決于東明屬之黃垆迤北去前決口不一里泛濫而下受害有甚於前於是山東荷澤等縣之官紳建議組織六縣修堤協會共籌款五萬元其分配法爲直魯各擔一萬元天津協會一萬元餘則由各縣等差分認之於十一年五月動工將四十八里之小堤盡行加寬加高與大堤埒並議定嗣後范莊以迄南端保護看守之責概歸直隸以十二年一月一日爲直隸接收看守之期其經費亦改爲兩省分擔

民國十二年七月初水大至洪浸稽天爲數十年所未有竟四決於長垣

東明縣誌

卷之一 黃河大堤

十一

境之郭莊東明固一片澤國而魯屬之荷澤各縣地處下游尤爲洶湧淹沒人畜室廬無算更引爲大憂乃復建議組織直魯八縣修堤協會共集款十三萬元而東明初次認籌一萬元卽以賑款撥付繼又認籌兩千五百元共計一萬二千五百元於十三年四月底興工至八月中始蒞事計高一丈六尺底寬六丈頂寬四丈兩旁植柳藉收盤錯之助十步一堆更備不時之需五里一堡堡有守特設七壩壩置員更於范莊迤北築圈堤二其修築之堅工程之浩直駕明代長堤大堤而過之矣小堤之情形如此

嗚呼河固不易治也而治之者類多不揣其本徒治其標甚至視爲兒戲等之弁髦若故規其潰決者卽標亦不知所在矣何治之與有例如民六以前以修築三汛圈堤之帑邑而注之小堤則小者必可不決而大者亦當無潰在國省不費之帑在民免流亡之災兩享其利便何如之而竟見

不及此卽及焉而亦不肯爲也必俟旣決之後民已其魚始皇皇焉以呈報栖栖焉而露宿已饑已溺視民如傷殊不知民已死矣何傷之如乎語云曲突徙薪爲非計焦頭爛額是上客玄哉言乎不啻爲近數十年河官言之也東明受害旣鉅知亦較確故不禁偶一哂絮耳而繼之者倘資爲殷鑒則七八縣之百姓式憑多矣

土質

禹區天下爲九州奠山川定氏族別貢獻更以道里之遠近土壤之優劣而頒朝覲會同之則商周相因未之或易秦漢而降滄桑迭更制度亦變若援古以例今不啻南轅而北轍也東明地接大河河之遷徙靡定而土質優劣亦因之無常本沙也而忽爲淤本塗泥也而忽爲飛沙甚至毛葦彌望之田一經水淤數月間卽可桑麻徧野故東明之土質極難言也爰就現在之情形約分爲淤地質青沙地質斥鹵地質沙地質不毛地質五者哀多寡別優劣以資攷鏡而策將來云

東明縣誌

卷之一 土質

十二

淤地質

淤地之質在田地中爲上品其色赤而黃其性堅而硬近河濱者率以是質爲多蓋因河水旣漲流之緩速不同其挾帶泥沙大抵在急流處所遺者爲沙質而緩衝之地所遺者屬淤質每值水漲不驟之際僅可漫衍于兩岸之旁故近河者此質爲多也宜種二麥及菰黃豆等縣屬田地占此質約爲百分之十

青沙地質

此地之爲質在縣屬田地內以爲上品鄉人所謂青沙地者也其色青而黃其質軟而和近百年來未曾大受河害者其土質率類是蓋以沙淤二者糅雜而成也有地面爲沙而其下數寸許卽爲淤者更有地面似淤而其下爲沙者每值耘耨之餘二質便糅和爲一其和而軟也實因此若當風雨調順之年是質收成或較遜於淤質倘遇旱或澇之時則淤質收穫所獲反不如此地質之爲愈也故播種五穀均稱相宜而縣屬田地爲此質者亦較多約爲百分之四十

斥鹵地質

此質在田地品類中爲下僅較強于飛沙鄉人所謂鹼地者也其色黑而青其性泥且塗草木半枯二麥不藝播種秋禾如梁菽之類卽稍有收穫亦殊寥寥獨適于煮土爲私鹽耳近年蘆綱之推運不及南繳而貧細之民藉是生存者殊不少此質在縣屬內所占約爲百分之十四五

沙地質

此質在田地中亦下品也其色白而黃其性塗而散近百年來迭受河害者大率此質爲多不過較強于不毛者耳若值秋澇之年則收穫較斥鹵者爲愈秋禾中如菽梁黍稷之類均可播殖若不潤以肥料則所得極少至于二麥之獲尤稱寥寥謂之比歲不登也可縣屬此地約爲百分之三十民困於生活蓋緣是也

不毛地質

此地幾不成質鄉人所謂飛沙不毛者也近百年來每于大河遷徙時而大溜所經之地率遺此種飛沙其色白其性散而碎卽以水滲和亦不成泥且其質中往往見星星之點爲黃白色古人謂淘沙得金殆此類歟偶

東明縣誌

卷之一 土質

十三

值狂風大作則飛沙石走撲面擊鼻避之不及也五穀之播殖無一可者卽茅葦亦多半枯鄉人或於畧域間植金簪菜等物若不資以肥料亦屬苗而不秀卽資矣而值亢旱之時依然秀而不實也縣屬此地亦占百分之五六今春杜勝集一帶呈經縣長任公轉懇蠲豁糧租之地卽是也亦可慨已此東明地質之大概情形也於是而曉然民困症結之所在矣淤地禹貢所謂赤埴厥田上上也僅占百分之十且濱大河除二麥稍爲有收至秋禾之期幾乎無年不水無水不淹餘若沙若斥鹵若不毛等田地或播焉而不殖或殖焉而不茂甚至知其無成將播而亦置之幾何其不散且亡也惟青沙地質尙稱麥秋可望旱澇皆登而所占則不及全數之半自瞻而已挹而注之則弗能也近年有翻地之舉收效者曾數見不鮮倘能踵而行之則占百三十之沙地質與占百十五之斥鹵地質者或有寥乎是在導之者爲何如耳然而不毛者依然呼庚癸而怨蒼天蠲免其

租稅蓋亦不得已中之一策也尙望將而進之以企工商之圖庶幾乎其可也

星度

東明處大河之南介兗豫之間東臨荷澤南接孟諸神與區奠之時蓋如此也商周代興列侯更封州域未變故在商爲豕韋氏之屬在周爲康叔衛之東偏就地理以驗天文按州域而界星野則營室東壁爲衛之分迨及戰國梁魏僭侯姬衛舊封被其蠶食殆盡而東明其一也然人事卽更天文不易歷古迄今依然室壁之野也

攷漢天文志云室壁在亥自危十三度至奎一度屬衛分今之開封以北抵大名覃懷西北抵漳鄴皆衛屬也東明處開大之中其爲室壁之野也明甚

又攷唐天文誌云營室東壁諷讐也自王屋太行而東北負漳鄴東及館聊又自河濟之交涉滎澤濱濟水而東接東郡之地更至開道王良至東壁在豕韋爲上流復循河濟而東接元枵爲營室之分東明在滎澤之東介河濟之交屬陳留而毗東郡者也其

東明縣誌

卷之一 星度

十四

爲室壁之野也益明甚近百年來歐風東漸學術一新談地理天文之學者多視星象分野之說爲無稽而以經緯之度別寒暑更以寒暑之差定經緯數較古而稍確事之驗亦不爽然天人之際居然畫而爲二似亦不無萬一之失焉

東明距黃河咫尺較下游爲近蓋冀魯豫三省之間也因是而考經緯之度若以南北計之當在北緯一百三十五度五分以東西計之當爲一百一十四經度氣候之寒暖尙稱適宜云

總之列星分野在今日若絕不足信者而究之事理未嘗不驗經緯爲度若毫無萬一失者而攷其經過或有小誤果無關於人事乎何以炎漢將興五星聚井名賢相會合壁聯珠更何以宋將南轍蚩尤旗出明之將屋螢惑入斗可知人事之休咎實有關於天象也故此次修誌兼星度而並載融新舊以兩存較之偏執已說而謬人議者不差愈乎

東明縣新誌卷之二

輿地誌

沿革表附

東明縣誌

卷之二 目錄

東明縣新誌卷之二

沿革

唐虞夏商周秦漢唐宋元明清實既不同名亦自異是國家之沿革也四岳列侯三十六郡十二州十八道十五路十三布政司十八行省代各有制制各有別是地方之沿革也而縣若鄉若亭之名亦卽隨國家地方之沿革爲沿革矣東明地濱大河屬介兗豫當營室東壁之野處魯衛曹宋之衝開化最早雄封是稱兼以數千年來迭受河害昏墊弗免遂致有時而暫廢有時而特復有時而外縣來隸有時而縣籍他併東昏東明名異而實則爲一河南河北時殊而地復不同參綜盤錯亟費搜尋而談輿地者尤當折肱折臂以詳求之也爰據舊誌採他書準之以時酌之以理敢望掛漏之無或免亥豕之有尙乞宏博者之來教也作沿革攷

按吾國史誌之例無不由簡而入繁唐禹以前尙已難詳盡也故于沿革之敘斷自有夏以期確覈

東明縣誌

卷之二 沿革

一

夏

東明爲兗豫二州之域禹貢兗州章首句曰濟河惟兗州蓋以濟水據其東南黃河距其西北凡介河濟間者皆兗州屬也東明適當其地然以今日之全境考之其西南一隅當在濟水之南則屬之豫州矣故曰爲兗豫二州之域至于屬之某岳某侯弗能詳也

商

朱文公有言伊尹相湯實以贊禹以其制度相因而無所更易也九州之名實未變則東明之仍屬兗豫也可知惟長垣誌云東長滑濮等縣在商乃豕韋氏之故封也今滑垣間有故韋城縣廢址猶存而垣屬東北隅今尙有韋園村垣誌又載爲豕韋故墟乃東明舊志絕未道及不敢臆斷爲必是也姑附志之以俟來者

周

周因殷殷因夏州域依然無變也而地則屬于衛侯國其始君康叔封爲文王第九子而太姒生也書康誥卽遣之國時之訓辭祝鮀對普范獻子曰封以殷墟賜及少昊少昊卽金天氏都曲阜及周曲阜爲魯都伯禽之所封也